

SEPTIMA DIOECESANA

# SYNODUS

S. BENEVENTANÆ ECCLESIAE


*Ab Eminentiss. & Reverendiss. in Christo  
Patre, & Domino*

FR. VINCENTIO MARIA

Ordinis Prædicatorum, Tituli S. Sixti S. R. E. Presbytero  
Cardinali Urfino, Archiepiscopo.

Celebrata die 24. Augusti MDCXCII.

SECUNDA EDITIO



BENEVENTI,

ex Typographia Archiepiscopali.

---

Anno MDCXCVIII.



# DECRETUM DE APERITIONE SYNODI.

In Nomine Sanctissimæ, ac Individuæ Trinitatis  
Patris, & Filii, & Spiritus Sancti, Amen.

FR. VINCENTIUS MARIA ORDINIS PRÆDICATORUM,  
*Miseratione Divina Tituli S. Sixti, S. R. E. Presbyter  
Cardinalis Urbinus S. Metropolitana Ecclesiæ  
Beneventana Archiepiscopus.*



Uccinis Sacerdotalibus septem, septimo die, septimo circuito, muri Jericho funditus corruerunt. (a) Septimam Nos Synodum, quæ buccina Sacerdotalis est, Deo propitio, exhibemus, ut errorum parietes, qui animarum pariunt ruinas, in parietinas omnino redigantur: Ecclesiastica vero disciplina, ad cuius incrementum Sanctissimi Prædecessores nostri anniversariâ Synodum statutam inviolabili studio servaverunt, vigeat, augeatur. Quapropter eandem Synodum superiore anno jam indicam hac ipsa die 24. Augusti 1692. ad Omnipotentis Dei, & JESU CHRISTI filii ejus Domini nostri, SS. Deiparæ, S. Michaelis Archangeli, B. Apostoli Bartholomæi, Sanctoornm Pontificum nostrorum Januarii, & Barbati, Sanctorum Dominici, & Philippi Nerii, cæterorumq; nostræ Civitatis Sanctoornm Patronoꝝ, alioꝝq; Sanctoornm gloriam, honorem, & laudẽ apertam esse, atque inceptam volumus, promulgamus, & decernimus.

*Reliqua decreta, nempe de modo vivendi in Synodo. de Ministris Synodalibus, de præjudicio non afferendo, de non discedendo, de oratione publica, de fidei professione, & de cæteris hujusmodi, habentur in actis, quæ in Archiepiscopali Cancellaria servantur.*

A 2

CA-

a Josue cap. 6.

*De confirmatione Diœcesanarum Synodorum annis sex  
præteritis editarum.*

**D**iœcesanas Synodos, una cum earum Appêdicibus annis 1686  
1687. die 24. Augusti. 1688. die 25. Octobris. 1689. 1690, &  
1691. consueta die 24. Augusti à Nobis editas, typis datas, & pro-  
mulgatas; præsentì Synodo confirmamus, & ab omnibus, quorum  
interest, inviolabiliter observari mandamus, sub pœnis in illis statu-  
tis, & comminatis.

## CAPUT II.

*De superstitionibus eliminandis.*

**1** **U**T Religionis virtus inter morales prima; & præcipua, per  
quam Deo debitum cultum, & honorem exhibemus, munda,  
& immaculata servetur; Animarum Rectores omnem, illi oppo-  
sitæ superstitionis speciem, sive ad divinationem, sive ad vanam ob-  
servationem tendentem, eliminandam curent: plebemque sibi com-  
missam edoceant, per hæc fideles (a) sensim fieri socios dæmonio-  
um.

2 Ad pacta siquidem cum dæmonibus inita (b) pertinet, quod  
in nocte S. Joannis Baptistæ, mulierculæ segnem in arvis carduum  
carpentes, ab ejus flore si viguerit, arueritve concupiti Sponsi ha-  
bendi, vel non habendi specimen desumunt.

3 Graviora sunt ea, quibus benedictarum rerum abusus acce-  
dit; nam pietatis specie impietas palliata grassatur. Ad quid enim  
nostræ Diœcesis alicubi, Dominica Palmarum, Clerici, & populus  
ad Cruces lapideas in compitis erectas, prius genuflexi, deindè stan-  
tes benedictos olivarum ramos Cruci alligant, quos vel feria sexta  
in Parasceve, cum detegitur Crux in Ecclesia, vel Sabbato Sancto  
ad primum campanarum sonitum solvunt inde, & ad suos deferunt  
agros? Nonne ceremoniæ ille in Rituali, Missalive, non præscriptæ,  
nonne tempus illud, & non aliud superstitionem, & vanam præse-  
ferunt observationem? Præterea ovorum benedictorum in Paschate  
cortices, benedictorum quoque ramorum frondibus commistæ, &  
circum præfatas Cruces disseminatæ, nonne de mentiam præter id,  
quod intrinsecus latere potest, portendunt?

4 Parochi itaque perniciosos hujusmodi errores, & abusus, doce-

---

a 1. Cor. 10. b ex c. Illud, quod 26. q. 2.

cendo prius, ut ignorantes advertant, deinde cogendo (ad tenorem Edicti S. Officii, quod in nostræ tertiæ Synodi Appendice præstò est) ut contumaces resipiscant, è suis paræciis omnino desternant.

## C A P V T I I I .

*De Sacris Imaginibus.*

**S**anctissimi Tridentini Concilii Patres (a) omnem diligentiam, & curam ab Episcopis adhibendam voluerunt, ut Sacræ Imagines procaci venustate non pingantur, nec ornentur, quatenus omnis lascivia vitetur, cum Domum Dei deceat Sanctitudo. At nostra hac tempestate tanta pictorum ineptia succrevit, ut in Ecclesiarum frontibus, in baptisteriorum fontibus, & in reliqua Ecclesia, tabulæ tam indocta manu depictæ videantur, ut risum potius excitent, quàm devotionem: cum tamen rusticorum pertinaci inscitiae non minoris consent, quàm si docto penicillo expressæ fuerint. Idcirco Ecclesiarum Rectoribus, Confraternitatum, piorumque locorum Administratoribus præcipimus, ne de cætero artis imperitos ad pingendum invitent, aliàs ipsi de proprio, quod perperam impenderunt, persolvent.

## C A P V T I V .

*De Baptisterio Ecclesiæ Metropolitanae.*

**B**aptisterium, quod Dionysius (a) *Matrem adoptionis*, Ambrosius: *Fontem sacrum*, & *regenerationis Sacramentum* appellant, unicum olim in Civitate qualibet, idque permagnificum extrui consuevit, ut apud Paulinum (b) Cyrillum (c) & Gregorium Turonensem videre licet. Et quamvis in Civitate nostra unaquæque Parochia suum haberet baptisterium, illud tamen absque propria Cappella, & ut plurimum post Ecclesiæ januam, nullo habito rerum delectu, prostabat. Verùm Terræmotus causa factum est, ut præfata baptisteria jacturam passa, in deteriorem statum devenirent. Quocirca in nostra Metropolitana Ecclesia Magnum Baptisterium, quæ par erat decentia, eaque, quam Sacri Canones tradidere, omnimoda forma ereximus, & ad illud omnes Civitatis Parochos, pro conferendo baptismo conventuros statuimus.

2 Quia verò munus baptizandi in nostra Metropolitana ad nos de jure spectat, & absentibus nobis, ad nostrum Archipresbyterum de

---

a Sess. 24. de innoc. ven. & Reliq. Sanct. & Sacris Imaginibus.  
a de Eccles. hierarc. b Ep. 12. c Catech. mystag.

de consuetudine: ne inter ipsum, & Parochos, neve inter ipsosmet Parochos lis ulla in Posterum oriretur, statutum, tam de Archipresbyteri, & Parochorum consensu, quam de nostra auctoritate, & beneplacito die 9. mensis Maii decurrentis anni in calce hujus Synodi apponendum firmavimus, & præsentì constitutione pariter firmamus, eique perpetuum firmitatis robur adiicimus.

## CAPUT V.

*De Celebratione Missarum, & Divinis Officiis.*

**I**Nfandum illud sacrilegii crimen, quod non ordinati sacrosanctum Missæ sacrificium celebrantes, & Pœnitentiæ non raro Sacramentum administrantes temerario ausu perpetrare per Italiâ comperti sunt, nè fortè, quod Deus avertat, in nostra Archidiœcesi, Rectorum negligentia, contingat, Encyclicas literas à Sac. Congregatione S. Officii die 26. Januarii currentis anni nobis datas, & in Appendice transcriptas, dieque 29. Martii evulgatas, rursus præsentì constitutione publicamus, mandantes omnibus Archipresbyteris, Rectoribus Oeconomis, & Vicariis præsertim foraneis, ut eas ad literam servant, nullique extero, sive secularis sit, sive regularis, se Presbyterum asserenti, facultatem divina celebrandi concedant, nisi à nobis, aut à nostro Vicario Generali, vel foraneis visis, & consideratis literis testimonialibus suorum ordinariorum, sive superiorum, talis facultas in scriptis eis concessa fuerit, sub pœnis etiâ corporalibus, arbitrio nostro reservatis.

2 Notum insuper facimus à Sac. Rituum Congregatione ad preces Cleri nostri per Nos eidem porrectas sub die 15. Septembris 1691. concessum, ut festum S. Rosæ Limanæ nostri Prædicatorum Ordinis infra octavam S. Bartholomæi Apostoli principalis Patroni nostræ Civitatis occurrens in posterum celebrari, & transferri possit ad aliam diem non impeditam, arbitrio nostro in perpetuum præfigendam, quam diem quintam Septembris perpetuis futuris temporibus destinamus. Decretum verò Sac. Congregationis prædictæ in appendice apponemus.

## CAPUT VI.

*De Pœnitentiæ Sacramento.*

**C**um nullus Presbyter, sive secularis sit, sive Regularis (a) confessiones secularium etiam Sacerdotum in nostra Diœcesi,

---

a *Trid. sess. 23. de refor. cap. 15. Urb. VIII. Const. cum sicut* 96.

cessi, sine examine, & approbatione nostra, privilegiis, & consuetudine quacunque, etiam immemorabili non obstantibus, audire valeat: ejusdem Diœcesis magnitudinî consulentes, duplex anni tempus pro habendo generali confessoriorum examine volumus præfinitum, scilicet post Dominicam primam Quadragesimæ, & post Dominicam primam Adventus: nam quotidiana illa examinandorum, præcipue Regularium, confluentia, irregularis est, & aliorum negotiorum expeditioni molesta.

## CAPUT VII.

*De Ecclesiæ Metropolitana Dedicatione.*

**M**etropolitanam Ecclesiam nostram Magnæ Deiparæ in cœlum assumptæ erectam, Apostolorum prædicationi synchronam, & à prædecessoribus nostris basilicè ampliata, à nobis quoque pro viribus instauratam, ornatam, terræmotus pratim deiecit, partim quassavit; verum ipsa Dei Genitricis, & Divo Philippo Nerio intercedentibus eam rursus restituimus, restitutamque, Deo benedicente, solemni ritu dicavimus die 26. Maji decurrentis anni, anniversario ejusdem S. Philippi Nerii natali die recurrente, pro ut in consecrationis Instrumento, quod ad perpetuam rei memoriam in Appendice insertum dabimus.

2 Cum autem dedicationis solemnitas per singulos annos sit celebranda, ipso Domino exemplum dante (a) qui ad festum dedicationis Templi, omnibus id faciendi datus formam, cum reliquis populis eandem celebraturus advent: Nos, ut opportunius id fieret, anniversarium diem in actu consecrationis in Dominicam primam post octavam omnium Sanctorum transtulimus, & translatum fore, & esse decrevimus.

3 Quod festum singulis annis tam in nostra Metropolitana, quam in aliis Ecclesiis Civitatis præfata Dominica celebrabitur cum octava (b): in Ecclesiis verò diœcesis tantum sub ritu duplici minori, (c) & sine octava.

## CAPUT VIII.

*De Altari Privilegiato.*

**S**ancti Philippi Nerii Altare in Nostra Metropolitana Ecclesia à nobis solemniiter dedicatum die trigesima mensis Maji decur-

---

a De consecr. dist. 1. c. solemnitates b S. Rit. Congr. in una Neapolitana.

c Exemplo Dedic. Basilic. Lateranem. in Breviar. Rom. die 9. Nov.

decurrentis anni, hoc privilegium est à S. Sede Apostolica decoratum, ut quoties missa ad prædictum Altare celebratum pro anima cuiuscumque Fidelis, quæ Deo in charitate conjuncta ab hac luce migraverit, ipsa de thesauro Ecclesiæ indulgentiam consequatur, quatenus Domini nostri Jesu Christi, ejusque Sanctorum meritis suffragantibus, à Purgatoriis pœnis liberetur: pro ut latius in brevi subdatum Romæ die xx. Septembris 1691. quod in Appendice exhibetur.

2 Cum itaque Altare hoc in tota Archidiœcesi unicum sit, quod tanto quotidiano, & perpetuo privilegio fulgeat, Animarum Rectores plebi suæ notum faciant, ut & qui defunctorum suffragiis student, & qui animæ suæ in posterum consulere, ut christianum est, voluerint, thesauro invento lætentur.

## D E C R E T U M

*De iis, quæ ad universas Constitutiones pertinent.*

**H**oc decretum, sicuti extat in prima Synodo, in hac septima confirmamus, volumusque, ut omnes, & singulos arctet, ac si ad verbum hic insertum, & relatum fuisset.

## D E C R E T U M

*De Synodi Conclusionem.*

**H**æc sunt, quæ Spiritui Sancto, & nobis decernenda visa sunt in præsentem nostram Septimam Diœcesanæ Synodo, quam optatum finem consecutam complemus. Propterea ipsam Deo, qui eandem cœpit, & perfecit, gratias agentes, concludendam esse decernimus, & conclusam denunciamus.

## D E C R E T U M

*De Indictione futura Synodi.*

**S**ynodum aliam futuram, juxta S. Conc. Tridentini Sanctiones, & antiquam Ecclesiæ nostræ morem, indicimus habendam esse die 24. Augusti sequentis anni 1693. nisi quod emerferit declarandum, seu decernendum in Synodo litaniarum, quæ de more habebitur die 25. Octobris currentis anni 1692.

## R O G I T U S A C T O R U M.

**P**rædicta omnia, & singula acta, & decreta in præsentem Synodo contenta, celebrata, promulgata, lecta, lata, & recepta fuisse in S. Metropolitana Ecclesia coram Reverendissimo Capitulo ejusdem Metropolitanæ, nec non Admodum Reverendis Capitulis Collegia-

ta-



tarum Urbis, & Clero Urbano, ac foraneo de more sub die 24. Augusti 1692. fidem facio, atque testor.

*Ego Blasius Grandi insignis Collegii S. Spiritus Canonicus,  
Not. Apostolicus, & Procancellarius.*

## ACCLAMATIONES.

*Habentur in prima Synodo Diocesana prope finem.*

## DECRETVM ULTIMVM.

*De Synodi dimissione.*

**A**D laudem Omnipotentis DEI, Beatissimæque semper Virginiſ MARIAE Matris DEI, S. Michaelis Archangelis, B. Apostoli Bartholomæi, SS. Pontificum Januarii, & Barbati, SS. Confessorum Dominici, & Philippi Nerii, reliquorumque hujus nostræ Civitatis Patronorum, cæterorumque Sanctorum, Synodum dissolutam, ac dimissam decernimus: itaut unicuique licitum sit ad proprias Ecclesias redire. Hortamur tamen, & obsecramus vos, Fratres charissimi, quatenus tales in vestro munere sitis, ut in moribus vestris hujus nostræ Synodi fructus elucescat, & vestro exemplo imitationem sanctæ plebs acquirat. Lauretanæ verò litanie adhuc singulis Sabbatis recitentur, DEO, B. Virgini MARIAE, & D. Philippo Nerio gratias agentes, quod tandem aliquando nostram Synodum in nostra Metropolitana Ecclesia persolverimus.

F I N I S.



B

Ju-

## JUDICES, ET EXAMINATORES SYNODALES

*Confirmati sunt omnes in prima, secunda, tertia, & quinta Synodo  
enumerati: additi vero Examinatoribus sequentes:*

Admodum Rev. Patres.

P. F. Chrisantus Feolo à Monte-sarculo S. Th. Lector jubilatus Ordinis Min. S. Francisci de Observantia.

P. Michael-Angelus Ruggieri Soc. Jesu Theologus.



APPEND

# A P P E N D I C E

AL SETTIMO SINODO DIOCESANO  
Della Santa Metropolitana Chiesa di Benevento  
Dell'Anno MDCXCII.

## I.

### B O L L A , O V E R O S T A T V T O .

Intorno al dover tutti i Parochi della Città battezzare nel Battisterio della Metropolitana, ed alla convenzione fatta fra essi, ed il Signor Arciprete, e fra essi medesimi.

*Cit. nel Cap. IV. de Baptisterio Ecclesia Metropolitana pag. 5.*

*Prater Vincentius Maria Ordinis Prædicatorum, miseratione Divina, Tit. S. Sixti S. R. E. Presbyter Cardinalis Ursinus S. Beneventana Ecclesia Archiepiscopus.*

**C**ommissi nobis per Divinæ gratiæ abundantia Pastoralis officii debitum jugiter Nos admonet, ut non solum vigilantia nostræ creditum Dominicum Gregem, sed etiam singulorum Rectorum ejus actiones intensa mentis acie collutremus. Cum itaq; Terræ-motus clade de anno 1688., nostris sic flagitantibus culpis, Ecclesiæ omnes, Parochiales præsertim, funditus sint everse, itaut in illis Sacramentorum administratio, quo par erat cultu, haberi non possit, fractis præcipue Baptisteriis, vel ad terram dejectis, vel necessariis suppellectilibus viduatis; Cumq; Baptismus inter Sacramenta, sicut primū locum obtinet, ita maxima etiam decentia ministraretur oporteat, magnum Baptisterium in nostra Metropolitana Ecclesia, Deo dante, basilicè instructum, ereximus, omnibusq; Civitatis Parochis jussimus esse commune, Sacris Canonibus maxime consonū ducentes, ut qui ejusdem Ecclesiæ filii censentur, in eadem regenerationis gratiam suscipiant. Quia verò ex una parte in præfata Ecclesia nostra Metropolitana jus baptizandi in eadem, quod propriè Archiepiscopale est, quando Nobis id muneris non exercere contigit, ad Archipresbyterum nostrum ex consuetudine spectat; itaut spontè advenientes ex quavis Civitatis Parochia ipse baptizet, & oblationes spontè oblatas recipiat, siquidem è converso ad eundem Archipresbyterum pertinet Baptisteriū manuteneri, & necessariis utensilibus habere instructum; ex altera parte unusquisq; Parochorum in sua Parochia Parochianos suos baptizandi, & oblationes spontè factas recipiendi liberum Jus habebat. Idcirco die octa-

va mensis Maii currentis Anni in Congregatione coram nobis, & Illustrissimo, ac Reverendissimo Coepiscopo nostro Pompejo Sarnellio Vigiliensi apud nos degente, habita, dilecti filii Archipresbyter noster, & Parochi Civitatis infra scripti cōvenere, scilicet Peril. & Adm. Rev. D. Julius de Marco V.I.D.S. Metrop. Ecclesię Archipresbyter. Rev. D. Dominicus Sciarra Rector S. Petri de Traferis -- Rev. D. Andreas Vollari Rector S. Angeli Portę Summę -- Rev. D. Joannes Baptista Limatola Rector S. Donati -- Rev. D. Januarius Boraglia Rector S. Salvatoris Portę Summę -- Rev. D. Bartholemaus Riccio Rector S. Marię Constantinopolitanę -- Rev. D. Franciscus Buscaino Rector S. Jacobi -- Rev. D. Carolus Pellegrinus Rector S. Marci de Sabarianis -- Rev. D. D. Nicolaus Mazzeus Viceabbas, & Curatus S. Modesti Canonorum Regularium Lateranensium. In eodq; Conventu, cū deberent omnes, & singuli Baptismi Sacramentum in Ecclesia nostra Metropolitana, ut prætulimus, de mandato nostro administrare, nè de cætero lis aliqua, veluti humana fert conditio, oriatur, intèr prædictum Archipresbyterum nostrum, & Parochos conventio, & transactio facta sunt, ut sequitur. Primò ipsi Parochi onus subibunt manutentionis, & munditiei Baptisterii, ac utensilium, nec nō Cappellę ejusdem, tum quo ad opus plasticum, quo exornatur, tum quo ad pavimentum, & Cancellos, demptis iis, quę ab integro reficienda prò tempore erunt, hæc namq; sumptibus mediorum fructuum deinceps fient. Idèdq; Archipresbyter noster omni onere solutus, nullū ex quibuscumq; spontaneis oblationibus recipiet emolumentum, quę omnia singulis Parochis ad suorum rationem Parochianorum debebuntur; Sèd nè quovis futuro tempore Parochi hac de re molestantur, per viam transactionis perpetuò valiturę singulis annis Archipresbytero nostro Ceterum offerent in die Sanctissimę Assumptionis B.V.M. valoris carolenorum decem. Secundò, & ut idem Archipresbyter in hoc baptizandi munere suavitatur præeminentia, duobus Sabbatis antè Dominicas Resurrectionis, & Pentecostes, in quibus Baptismata Nobis reservavimus, & omninò reservamus, Nobis absentibus, sivè legitime impeditis, ipse per se, vel per alium suo nomine persolvat; nec non singulis annis ex quavis Parochia binos infantes, in universum sexdecim baptizare vel per se, vel per alium; ad tenorem Synodaliū Constitutionum approbatum, valebit; verum ipse Archipresbyter quotiès hujusmodi Baptismum ministrare voluerit, Parochum baptizandi antea ad-

mo-

monebit; nè hic ad functionem persolvendam accedens fortasse ab-  
 stinere cogatur; alias Parochus ad præfatam functionem accedens  
 ipsemet persolvere non prohibebitur; necnon spontaneæ oblationes  
 quæcumq; ut supra tam dictis Sabbatis duobus, quàm reliquis die-  
 bus, ut prætulimus ad baptizatorum Parochos respectivè specta-  
 bunt, nisi fortè oblatio duplex, altera pro Archipresbytero nostro,  
 altera pro Parocho fiat, tunc enim Archipresbyter spontanea illa  
 oblatione fruatur. Ipsi verò Parochi, si per alium non Parochum,  
 sed ad tenorem ut supra approbatum Baptismi Sacramentum mini-  
 strare voluerint, ab eodem nostro Archipresbytero ille Presbyter li-  
 centiam obtinebit. His actis, & tam de consensu Archipresbyteri  
 nostri, quàm Parochorum, & nostra accedente auctoritate, ac bene-  
 placito, firmatis, ipsi Parochi pro re bene gerenda ita inter se conve-  
 nerunt. Primò ut habeatur Armariū in Sacristia Cappellæ SS. Cor-  
 poris Christi, in quo asservetur claves fontis baptismalis, duo super-  
 pellicea pro Parocho nempe, & pro Acolytho, Stola violacea, & al-  
 ba, Rituale Romanum, & liber, quem Matriculam vocant, atramen-  
 tarium, & quidquid præterea necessarium est, ære pro rata collato à  
 singulis Parochis, prout opus fuerit, comparanda. Unusquisq; verò  
 Parochorum suam clavem pro dicto Armario recludendo habebit.  
 Secundò sumptibus etiā communibus, ut prætulimus, stipendium  
 ducatorum duodecim annuorum solvetur Acolytho, cujus partes  
 erunt, assistentiam præbere in Ecclesia Metropolitana, ut quoties  
 opus fuerit paratus sit, tum pro Sanctissimi Viatici, tum pro Baptis-  
 matis administratione. Ipse verò Acolythus deputandus est, vel  
 amovendus, cum opus fuerit, ad nutum eorundem Parochorū. Ter-  
 tio liber, Matricula nuncupatus, usui erit pro adnotandis omnium  
 Paræciarum baptizatis ad formam. Verum non idcirco unusquisq;  
 Parochorum suum baptizatorum librum deferet, sed ad formam  
 Synodalem habebit, & ejus scripturam prosequetur. Nemini verò  
 licebit, præfatam Matriculam ex Armario asportare, aut ex eadem  
 documenta transcribere, nisi proprio baptizati Parocho; caveatq;  
 quisquis fuerit falcem in messem alienam immittere. His pariter  
 actis tam de Parochorum consensu, quàm de nostra auctoritate, &  
 beneplacito publicum super omnibus qua ad Archipresbyterū no-  
 strum, qua ad Parochos spectantibus, & horum serie enarratis con-  
 sectum fuit Instrumentum rogato Notario Josepho de Pompejo ea-  
 dem die octava mensis, & anni currentis. Quapropter ad prædi-  
 cto-

Qorum Archipresbyteri nostri, & Parochorum instantiam hoc præ-  
senti stabili, firmo, perpetuo statuto, præmissa omnia, & singula se-  
cundum eorum seriem, continentiam, & tenorem auctoritate nostra  
Archiepiscopali perpetuò servari mandamus sub pœnis arbitrio  
nostro prò contumaciæ qualitate reservatis. Nemo autem ex iis, qui  
nobis subditi sunt, hanc nostram paginam jussionis, conventionis,  
transactionis, firmi, stabili, perpetuique, statuti, & mandati infringere,  
vel ei ausu temerario contraire præsumat, sed potius omnes, & sin-  
guli, ut dilectos filios decet, executioni demandare hilaritèr satagât.  
Contradictores quoscunque etià per Censuras Ecclesiasticas com-  
pescendo. Datum Beneventi ex nostro Archiepiscopio die nona  
Mensis Maii anno Domini 1692. Pontificatus nostri Beneventani  
anno VII. Ordinationis verò nostræ XVIII.

FR. VIINC. MARIA CARD. ARCHIEP.

*Cl. Dom. Fontanella Not. Apostolicus  
prò Dom. Cancell.*

## II.

### LETTERA CIRCOLARE

Della Sag. Congreg. del S. Officio, che non si lasci celebrare niun'es-  
tero, che si asserisce Prete Secolare, ò Regolare, senza la licenza  
della Corte Arcivescovale, riconosciute prima le lettere  
testimoniali degli Ordinarii, ò de' Superiori.

*Citata nel Cap. V. de Celebr. Miss. & Divin. Offic. n. 1. p. 6.*

*Foris.* All'Eminentiss. e Reverendiss. Signor mio Osservandiss.

Il Sig. Cardinal Orsini Arcivescovo di Benevento.

*Intus.* Eminentiss., e Reverendiss. Sig. mio Osservandiss.

**S**E bene altre volte sotto li 20. febbrajo 1649. da questa Sagra  
Congregatione del S. Officio, volendosi al possibile ovviare al  
delitto di coloro, che vanno per Italia celebrando Messe, e tal ora  
cōfessando, ancorche nō siano promossi al Sacerdozio, sù con lettera  
simile d'ordine del Papa ingiunto à tutti gli Ordinarii l'invigilarvi  
con opportuni Ordini à i loro Vicarii Generali, e foranei; nondime-  
no, perche ciò non ostante, ora spesso per la trascuraggine, come si è  
riconosciuto da' medesimi Vicarii, e particolarmente de foranei del-  
le Terre, e Castelli fuor di mano, e penuriosi di Sacerdoti agevol-  
mente si vā commettendo sì enorme sacrilegio, non usando essi le  
dovute diligenze di farsi mostrare, & esaminare le Dimissorie di co-  
loro

loro, che pretendono di celebrare, che talora non le hanno, ò se pure le hanno son false; Quindi è, che di nuovo ad oggetto di ovviare à questo delitto la medesima Sagra Congregatione hà stimato espediente di significarlo, come fà, con questa mia lettera a V. Em. affinché si degni dar ordini precisi al suo Vicario Generale, & a' foranei, che à Preti, & à Regolari farastieri non concedano licenza di celebrare, se prima non presentano le lettere testimoniali del Sacerdozio de' proprii Ordinarii, e Superiori, e quelle siano tali, che nō habbiano minima ombra di sospetto di esser false con imporre a' medesimi Vicarii in caso di negligenza, ò trasgressione pene particolari, anco corporali, sopra di che la S. Congreg. attende da V. Em. l'avviso dell'esecuzione, e ricevuta della presente; e bacio à V. Em. umilissimamente le mani. Roma 26. Gennaio 1692.

Di V. Em. Humiliss. e devotiss. Servo. *A. Card. Cybo.*  
Benevento. Signor Cardinal Arcivescovo.

III.

D E C R E T O

Della Sagra Congregatione de' Riti intorno alla traslazione della festa di S. Rosa Vergine Limana per la Città, e Diocesi.

*Citato nel Cap. V. sudetto de Celebr. Miss. & Divin. Offic. n. 2. pag. 6.*

D E C R E T U M.

**A**D preces Cleri Civitatis Beneventanæ per Eminentissimum, & Reverendissimum D. Cardinalem Ursinum ejusdem Civitatis Archiepiscopum in Sacrorum Rituum Congregatione porrectas, eadem Sacra Congregatio concessit, ut festum S. Rosæ Limanæ Ordinis Prædicatorum occurrens infra octavam S. Bartholomæi Apostoli principalis Patroni dictæ Civitatis in posterum celebrari, & transferri possit ad aliam diem non impeditam, arbitrio ipsius Eminentissimi Archiepiscopi præfigendam, & amplius nunquam immutandam, servatis tamē Rubricis Missalis, & Breviarii Romani. Die 15. Septembris 1691. *A. Card. Cybo.* Locus \* Sigilli. *I. Fallmannus S. R. Cong. Secretarius.*



## I S T R U M E N T O

Della solenne consacrazione della Chiesa  
Metropolitana.

*Citat. nel Cap. VII. de Ecclesiæ Metropolitana Dedicazione.*

**I**N DEI NOMINE. Amen. Præsentî hoc publico instrumento cunctis ubique pateat evidenter, & notum sit, qualiter Eminentiſſis, & Reverendiſſis. in Christo Pater, & Dominus, Dominus Fr. Vincentius Maria Ord. Præd. miserat. Divinâ, Tit. S. Sixti, S. R. E. Presb. Cardinalis Ursinus, S. Beneventanæ Ecclesiæ Archiepiscopus in ipsis liminibus electionis suæ, quæ incidit in diem 18. Martii 1686. inter cætera, quæ reparanda suscepit, nempe Archiepiscopium ruës, Basilicam S. Bartholomæi, & Seminarium magna reparatione indigentia, principem locum sibi vendicavit innovatio potius, quam instauratio Ecclesiæ Metropolitanæ, quæ temporis injuria antiquæ magnificentiæ nil, nisi amplitudinem retinebat, & hanc additamentis deformem: quinque siquidem naves, columnis suffultas, paries ad Ecclesiæ sinistram non rectus concludebat, ad Ecclesiæ dexteram tres Cappellæ extremum parietem turrim Campanariam versùs debilitarant; & quia vitium fecerant debilem in ruinam trahebant, cui manum dabat aqua pluvia, quæ in cisternam, ibidem jacentem per ipsam Ecclesiam defluebat. Cæteræ verò Cappellæ, ad parietes extantes, abque ordine erant distributæ.

Ecclesiæ hujus fundatio, Christianitati in hæc Civitatem inveſtæ contemporanea, S. Photino per SS. Apostolum Petrum *Episcopo I.* Consecrato anno Domini quadragesimo tribuenda videtur. Ipsam verò Basilicam, tunc temporis exiguam, Magnæ DEI Matri in Cælum assumptæ *David inter Episcopos XXXI.* die XV. Decembris anno Domini DC. Gregorio Magno Summo Pontifice dicavit. Sic deindè Serenissimæ Longobardorum stirpis *Princeps IV.* circa annum Domini DCCCXXIX. additis columnis ex Trajani Arcu, quem Portam Auream nunc vocant, translatis ampliorem, & venustiore reddidit. Ditiorem fecit *Sicardus Princeps. V.* qui anno Domini DCCCXXXVIII. ex Lipara Insula thesaurum Corporis D. Bartholomæi Apostoli in eam transtulit, inchoata pro decetiori cultu Cappella, quam *Ursus XLII. Episcopus* complevit: & die XXV. Octobris anni DCCCXXXIX. Apostolica Lipsana in ea locavit. Cum verò hæc Sedes Archiepiscopatus honore, primo in iis Provin-

ciis,



ciis, quas nunc Regnum Neapolitanum appellamus, à Joanne PP. XIII. anno CMLXIX. insignita fuisset, *Roffridus II. Archiep. XI.* longè ampliorem suam voluit Metropolitanā anno Dom. MCXXIV. cui marmoreum prospectum, & valvas æreas historiis, & Suffraganeorum XXIV. imaginibus decoratas adjunxit Cardinalis *Rogerius Archiep. XVI.* circa annum Domini MCXCIX. Turrim autem Capanariam, quæ desiderabatur, Confluentibus Cleri, & populi oblationibus à fundamentis erexit *Romanus de Capo-ferris* Concivis, & *Archiep. XVIII.* anno Domini MCCLXXIX.

Quia verò in ipsa Terra, quæ licet in æternum flet, nihil tamèn stabile reperitur, ejus motu de anno MCDLVI. die XXX. Decembris hora XVI. *Jacobo II. della Ratta Archiep. XXXVIII.* præfata Ecclesia quassata remansit, Pii PP. II. pietate, quæ adhuc perseverat, instaurata fuit. Aram deindè Maximam ingenti, & integro marmore testam *Conradus Capycius Archiep. XL.* erexit, & à Jacobo de Appiano ex Dominis Plumbini Episcopo Gravinensi sacratam voluit anno MCDLXXIII. die XIV. Novembris: Nollris quoque temporibus *Joannes Baptista Foppa* fel. rec. *Archiep. LVIII.* qui vixit usque ad annum MDCLXXIII. prædecessorum suorum magnanimam pietatem æmulatus aureo loquari rectam mediam, & transversam navim honestavit.

Quia verò tempus edax rerum, & invidiosa vetustas omnia cōsumunt Eminentissimus Archiepiscopus noster Ecclesiam suam in statu, quem prætulit, reperit. Quamobrem sollicitas operi manus adhibens nō mediocri sumptu quinque naves, duobus novis parietibus lateralibus direxit, fulsitq; rejedilq; superfluis aptam membrorum omnium, partiumq; dispositionem effecit, & universa plastico opere graphicè inducō exornavit. Secretarium, Scevophilacium, livè Cimeliarchium furditus erexit: principem Aram sedilibus pretiosisque marmoribus compositam statuit, & sub ea viginti plumbeas capsulas Sanctorum reliquiis refertas collocavit die X. Novembris MDCLXXXVII. Nomina præfatorum Sanctorum habentur in instrumento collocationis earundem, quod confecit Dominus Abbas Andreas Vollari tunc temporis Notarius Apostolicus, nunc verò Notarius, Prothonotarius nuncupatus rogatus sub eodem die, & anno.

Verum quàm inopes Consilii simus nescientes quid superventura ferat dies, annus subsequens MDCLXXXVIII. ostēdit an die nēpē 5.

G

Junii

Junii ingenti Terræmotu dejecta Civitate universa, caput, & brachia Ecclesiæ corruere, & naves ipsæ quassatæ sunt, Secretarium cecidit, & omnia vel ruinam passa, vel ruinæ proxima, Archiepiscopium quoque nuper instauratum, & auctum in præceps ruit, atque Eminentissimum Archiepiscopum secum traxit, ac ruderibus sepelivit, ex quibus D. Philippi Nerii præsentis ope, magno quidem prodigio extractus, & propè redivivus ad reparandas ruinas servatus fuit.

Rem probavit eventus: Eminentissimus D. Archiepiscopus, opibus, non animi viribus fractus die xiv. Novembris ejusdem anni MDCLXXXVIII. urbanam visitationem habuit, ac diruta Metropolitanæ, & Archiepiscopii à fundamentis reficienda mandavit, quæ tandem omnia Deo dante, & D. Philippo Nerio intercedente ad consumationem devenire: eandem namque Metropolitanam Ecclesiam nobilius resectam cum ara maxina, & sexdecim Cappellis, Choro, Fonte baptifinali, pastophoriis, Bibliotheca, omni que ornatu hac die xxvi. Maii in Natali S. Philippi Nerii solemnî ritu sacra- vit, obtenta à SS. Patre nostro Innocentio PP. XII. Indulgentia plenaria, prout latè patet in Brevi tenoris, qui sequitur, v3.

*INNOCENTIVS PP. XII. Universis Christi fidelibus presentes literas ipspecturis salutem, & Apostolicam benedictionem. Ad augendam fidelium religionem, & Animarum salutem, cœlestibus Ecclesiæ thesauris pia charitate intenti, omnibus utriusque sexus Christi fidelibus verè pœnitentibus, & confessis, ac Sacra Communione resectis, qui Ecclesiam Metropolitanam Beneventanam die, qua dicta Ecclesia solemniter consecrabitur, devotè visitaverint, & ibi pro Christianorū Principum concordia, hæresum extirpatione, ac Sanctæ Matris Ecclesiæ exaltatione pias ad Deum preces effuderint, plenariam omnium peccatorum suorum indulgentiam, & remissionem misericorditèr in Domino concedimus, presentibus pro unica vice valituris. Volumus autem, ut si pro impetratione, præsentatione, admissione, seu publicatione presentium aliquid, vel minimum detur, aut sponte oblatum recipiatur, presentes nulla sint. Datum Romæ apud S. Mariam Majorem sub annuo Piscatoris die vigesima prima Augusti MDCXCI. Pontificatus nostri Anno primo.*

I. F. Card. Albanus

Gratis pro Deo.

Pro cujus publicatione Notificationem typis datam in Civitate, & Archidiœcesi affigendam edidit in hæc verba:

NO-

**NOTIFICAZIONE.** Essendosi coll'ajuto di Dio, e spezial protezione della B.V., S. Bartolomeo, S. Domenico, e S. Filippo Neri, & altri Santi Protettori compiuta la fabbrica della Chiesa Metropolitana, l'Eminentissimo Arcivescovo ha destinato Lunedì 26. del corrente mese di Maggio secondo giorno della Santissima Pentecoste, e festività del glorioso S. Filippo Neri per la solenne Consacrazione della medesima. Però s'intima un'Ecclesiastico digiuno di precetto a tutto il popolo della Città per lo Sabato antecedente, che sarà a' 24. del detto mese.

Ed acciocchè l'allegrezze dell'Encenis siano più proficue allo spirito si fa noto a tutti, che chiunque confessato, e comunicato visiterà in detto giorno 26. di Maggio la sudetta Metropolitana, ed ivi pregherà devotamente nostro Signore Iddio per l'esaltazione della S. Madre Chiesa, per l'estirpazione dell'eresie, e per la concordia fra' Principi Cristiani conseguirà indulgenza plenaria, e remissione di tutti i suoi peccati, conceduta dal nostro SS. Padre Innocenzo Papa XII. conforme appare per Breve spedito sotto la data de' 21. Agosto 1691. Quindi si esortano tutti a venir a conseguire un tanto tesoro.

Idcirco ad perpetuam rei memoriam ego infrascriptus Notarius Apostolicus Prothonotarius nuncupatus, & ejusdem S. Metropolitanæ Ecclesiæ Canonicus Bibliothecarius cum infrascriptis sex Reverendissimis DD. Apostolicis Connotariis Prothonotariis item nuncupatis, de mandato ejusdem Eminentissimi accessimus ad dictam Metropolitanam Ecclesiam, & vidimus eundem Eminentissimum Archiepiscopum pontificalibus indutum assistente Illustrissimo, & Reverendissimo D. Nicolao Antonio Tura Episcopo Sarnen. præfatam Ecclesiam solemniter ritu dicantem, & in medio principis Aræ collocantem capsulam plumbeam altitudinis digitorum duorum, & latitudinis sex hesternæ die à se benedictam, in qua recondabantur Sacra liptana SS. Martyr. Festi Diaconi, & Desiderii Lecloris ejusdem Metropolitanæ Ecclesiæ; nec non S. Barbari Pontificis prædecessoris ejus, & reliquiarium ossis nigri coloris, Crystallo obferatum, in quo inclusa erant ex una parte de præcordiis, de capillis, de camicia, & de veste S. Philippi Neri; ex altera imago argentea ejusdem Sancti, cum tribus granis incensi, & duabus schedulis de pergameni, quarum altera, hujus consecrationis documentum continens erat tenoris, qui sequitur.

Anno Domini MDCXCII. die xxvi. mensis Maii feria II. post Dominicam Pentecost. & natalitia S. Philippi Neri, Patroni hujus nostræ

*Civitatis, totiusque Cleri, tum ejusdem Urbis, tum nostræ Archidia-  
cesis Protectoris, Ego Frater Vincentius Maria Ord. Prædic. miseratione  
Divina. Tit. S. Sixti S. R. E. Presbyt. Card. Ursinus S. Beneventanæ  
Ecclesiæ Archiepiscopus consecravi Ecclesiam hanc, & Altare hoc in  
honorem B. V. M. ad Cælos Assumptæ, & Reliquias SS. Martyrum Fe-  
sti prælibatæ nostræ Ecclesiæ Diaconi, Desiderii itidem ipsius Ecclesiæ  
Leitoris, Barbatii Pontificis Prædecessoris nostri in hac eadem Sacra-  
tissima Sede Confessoris, ac præfata nostræ Civitatis Patroni, & Phi-  
lippi Nerii Confessoris, in eo inclusi: & singulis Christi-fidelibus hodie  
indulgentiam plenariam SS. Innocentius XII. Pont. Max. ad meas  
preces benigne largiri dignatus est; & in die Anniversario Consecra-  
tionis hujusmodi ipsam visitantibus centum dies de vera indulgentia  
in forma Ecclesiæ consuetæ Ego pariter concessi*

*Hæc est LIV. Ecclesiæ a me, licet indigno, consecrata, & Altare hoc.  
LIV. in eisdem Sacratu præter alia fixa LXXII. & portatilia CCCXII.  
quæ Sacris eisdem ritibus initiavi.*

FR. VINCENTIUS MARIA CARD. ARCHIEP.

Nicolaus Anton. Episc. Sarnen. assistens.

Altera verò erat tenoris sequentis.

*Vehemens ille Terræ-motus, qui contigit Anno MDCLXXXVIII.  
die v Junii cum totam penè Metropolitanam hanc nostram Ecclesiam,  
& Urbem devastasset, Ego à ruinis Archiepiscopii obrutus mortem non  
obii, sed miraculosa ope S. Philippi Nerii mei tutelaris Patroni illæsus,  
nedum vivus extractus; merito ejusdem Sancti supernas impetravi  
suppetias, ut in paupertate mea præpararem impensas Domus Domini.  
Eandem igitur Ecclesiam, quam antea præ mea imbecillitate restau-  
raveram, & ornaveram, vi terræ-motus collapsam denuò partim à  
fundamentis reedificandam, partim restaurandam, ornandamque  
curavi. Cumque ego miser peccator Frater Vincentius Maria Ord.  
Præd. miseratione Divina, Tit. S. Sixti S. R. E. Presbyter Cardinalis  
Ursinus Archiepiscopus tantum hoc beneficium ab auxiliarii interces-  
sione apud Deum ejusdem erga me Sancti agnoscam, illud non reti-  
cendum; sed humillimè cum gratiarum actione fatendum censui: &  
hoc de voti cultus, devotique animi anatema in actû consecrationis  
huius, meæ Ecclesiæ, & Altaris ipsius Divo Philippo Nerio iure debi-  
tum existimaui; & hic inclusum apposui hac die Encœniorum meæ  
Sponsæ, ac natalis mei Sancti Protectoris xxvi mensis Maii Anno Do-  
mini MDCXCII. Pontificatus mei Beneventani Anno vii. Ordinatio-  
nis verò meæ xviii.*

FR.

FR. VINCENTIUS MARIA CARD. ARCHIEP.

Ab hac schedula pendebat solita plumbea bulla , serica cordula alligata ex una parte habens signum Crucis in medio , & imagines B.M. & B. Bartholomæi Apostoli cū hac inscriptione - S.M. - S.B. - Ex altera, cū literis inscriptis -- FR. VINC. M. ORD. PRÆD. CARD. URSINUS ARCHIEP. BENEV.

Quæ capsula alligata fuit vitta coccinea , in cūjus nodis apposita cera hispanica in hanc appositum fuit unum sigillum Eminētiss. Archiepiscopi.

Quibus omnibus sic persolutis Adm. Rev. Dominus Thomas Zarro Decanus, & Canonicus insignis Collegii S. Spiritus huius Civitatis Subcollector Archiepiscopalis mediorum fructuum ad tenorem Bullæ s. m. Pii Papæ II. sub datum Mantuæ anno Incarn. Domini. MCDLIX. non. Septembris Pontificatus sui anno II. obligavit sese nomine prædictæ Ecclesiæ ipsam Metropolitanam, sic consecratam manutenere , & omnibus necessariis , & opportunis instruatam reddere.

Deindè Ven. Presbyt. Antonius Alderisius Archiepiscopalis mensæ Oeconomus pariter nomine prædicto se obligavit marmoreum lapidem infra quatuor menses apponere cū hac Inscriptione.

D. O. M.

**B**asilicam hanc Sacrosanctam Christianæ fidei in Civitatem invectā coavam Magna Dei Matri in Cælum Assumptæ erectam, adhuc exiguam David Episcopus XXXI. dedicavit die XV. Decembris anno salutis DC. In ampliorem, & decitiorem formam funditus evertit Sico Longobardorum gentis Princeps IV. anno DCCCXXIX. Augustiorem reddidit Roffridus Archiep. XI. anno MCXXIV. Marmoreo prospektu, & ereis valuis exornavit Cardinalis Rogerius Archiep. XVI. Seculo circiter XII. Aram maximam Conradus Capycius Archiep. XLI. erexit; & à Jacobo de Appiano Episcopo Gravinens. Sacratam voluit die XIV. Novembris MCDLXXIII. Eleganti, deauratoq; laqueri mediam, rectamq; navim, atq; transversam honestavit Joannes Baptista Foppa Archiep. LVIII. defunctus anno MDC. LXXIII. Tandem Fr. Vincentius Maria Ord. Præd. Tit. S. Sixti S. R. E. Presb. Card. Ursinus Archiep. LXI. electus die XV. Martii MDCLXXXVI. eandem Ecclesiā vetustate squalidam, adiunctis cappellis deformem, instaurans, duos integros laterales parites præfatis cappellis ruentibus dejectis, à fundamentis erexit, direxitq; XVI. Sacella ipsis parietibus

ribus bærentia plastico opere construxit, duo in eis marmorea Altaria refecit. Principem Aram graphica variorum marmorum structura ab integro statuit, sub qua XX. plumbeas capsulas Sanctorum, reliquiis refertas solemni ritu locavit die X. Novembris MDCLXXXVII. & pensilem ipsi Ara addidit umbellam. Crucibus; & candelabris ex aurichalcho altaria omnia instruxit, cancellis munivit, argentæq; auxit supellectilem. Tetum recentavit; vitreas valvas fenestris apposuit navium collateralium contignationes nudis addidit lacunaribus; parietes omnes plastica decoravit manu. Pavimentum integrum lateribus stravit: muros exteriores lorica obduxit: Chorum nuceis ex tabulis decentissimè efformavit, Chori fornicem, eique respondentem majoris janua parietem picturis insignivit. Chori, & transversa Navis pavimentum lapidibus stravit; & hinc inde ab Ara maxima sepulchra duo, præ Archiepiscopis a dextris, præ Canonicis à regione constituit. Pastophoria, Choro collateralia, adjunxit, nempe à templi dextris Secretarium à fundamentis erectum, & Divo Thomæ Aquinati dicatum medium inter Canonicorum, & Mansenariorem Sacrificas, & post hanc additum Scætophilacium: à sinistris templi Beneventanæ Bibliothecam nobiliorem in modum construxit. Baptisterio propriam Cappellam, Turrinæ Campanarum respicientem, dedit. Omnia verò prædicta Terra-motu diei V. Junii MDCLXXXVIII. propè deperire. Sed Archiepiscopi Animus Domini suffultus præsidio; effectus jaßura major, Ecclesiæ caput, & brachia collapsa restituit: Chorum altiore effecit. picturisq; rursus decoravit, sedes nuceas ab integro extruxit; duo majora sacella denuò erexit, tetum semel, atque iterum suffulsi, & tegulis textit; laqueare deauratum in Navi media instauravit; transversæ Navi, & quatuor aliis minoribus contignationes affinxit, & mediæ similes penicillo effecit: Arcum Ara maxime imminentem, sublimiorem reddidit; ipsam Aram refectam cancellis marmoreis, pensilique nobiliori umbella protexit. Chori, totiusq; transversæ Navis pavimentum casa fractum marmoribus complanavit: novos laterales parietes, qui columnarum casum prohibuerunt, aliosque Ecclesiæ muros recentiori opere plastico reaptatos nitidiora bærentia sacella exornarunt, in quibus XVI. nova erecta Altaria integris mensis, gradibusque Candelabrorum marmoreis, additisque univèrsis cancellis, tabulas Sanctorum imagines præferentes ipsis Altaribus apposuit, & Tabernaculum marmoreum præ Sacra Synaxi custodienda graphice elaboratum constituit. Vitreas valvas fenestris

stris omnibus refecit. Columnas, Pulpita marmorea, Candelabrum item marmoreum tessellato opere antiquitatis constructa, multisque in partibus deficientia instauravit; pavementum lateritium restituit, & omnia in eo sepulcra aptavit, dupliciq; lapide munivit. Odea duo cum Organis confecit; Sedes confessionales, & armaria nucea per Ecclesiam noviter struxit. Portas renovavit, collateralem columnis fultam erexit: atrium restituit: integram Ecclesiam exterius incrustavit, & faciei, apicem adjunxit. Cappellam Sanctissimi Corporis Christi construxit, pro marmoreo tabernaculo emicyclum statuit; Sacristiam propriam cum suis armariis adjunxit; Cameram pro Confratrum Oratorio distinxit; Baptisterii Sacellum refecit, Fontem miranda magnitudinis ex lapide lydio reintegravit. Ciborium nobile impesuit, piscinam supposuit, armariolum pro utensilibus construxit, cancellis locum munivit. Secretarium denuo erexit; ipsumque marmoreo Altari decoravit. Posticum Armarium pro reliquiis, argenteis thecis, & statuis; arcubusque marmoreis servandis composuit; se junctum ab altari marmoreum ciborium tabulam cum Sancti Thomae Aquinatis effigie continens subuexit. Circumquaque ex nuceo ligno sedes, in infima parte armaria cum vestium mensis extruxit. Sacristiam communem cum labro, armariis, & mensa refecit. Cameram vestiarum cum magnis armariis instituit, in qua omnis generis suppellectilia pro Archiepiscopo, Canonicis, & Altaribus, vasq; argentea quaecunq; asservantur. Canonicaem Sacristiam, S. Barbati nuncupatam, armariis circumquaq; & magna mensa instruxit, magnamq; fenestram, vitreis valvis decoratam, aperuit. Sacram deniq; Campanarum Turrim ad fastigium provexit. Quibus omnibus summam apposuit manum Anno reparatae salutis MDCXCII. die XXVI. Mensis Maii natalizio S. Philippi Nervi, qui è Terra - motus ruinis eundem Archiepiscopum mirum in modum extraxit; & vires pro tanto onere semel, atq; iterum subeundo impetravit: Eo namq; die Ecclesiam ipsam de integro propè erectam cum principe Ara solemni ritu sacravit; & omnibus Christi-fidelibus anniversarias hic fundentibus preces Dominica 1. post octavam omnium Sanctorum, in quam Dedicationis festum transfudit, centum indulgentiae dies concessit.

Tum quod divina officia in ea persolvenda, cum Reverendissimi Capituli id muneris sit, eis obligatio de jure incumbit, cui semper tanta pietate satisfecit, ut Summi Pontifices, praecipue Joannes XIII. in Bulla erectionis Archiepiscopatus sub datum VII. kal. Junii anno

CMLXIX.

**CMLXIX.** eam condignis laudibus extulerint. Reverendissimi tam  
men Dignitates, & Canonici, scilicet:

**DD.** Julius de Marco V. J. D. Archipresbyter:

Joannes de Nicaſtro V. J. D. primicerius primus.

Aloyſius Antonius Ajellus S. T. D. Primicerius ſecundus.

Andreas Moſcarellus Theſaurarius.

**Ego** Agnellus Rendina V. J. D. Bibliotecarius.

Joſeph de Dominicis )

Cæſar Ciarletta )

Joſeph Cocozzella )

Joſeph Fuccius )

Dominicus Croce )

) Canonici Presbyteri.

Joſeph Muſtus )

Matthæus de Matthia )

Scipio Perotta )

Joſeph de Martino )

Benedictus Mariella S. T. Prof. )

Vincentius de Vita in V. J. licent. )

Scipio Chariffimus )

Joannes Baptiſta de Martino V. J. D. )

) Canonici Diaconi.

Bartholomæus Feulus )

Dominicus Maſtrojanni )

Franciſcus Spataccinus )

Nicolaus Saracenus )

Dominicus Roſſi )

) Canonici Subdiaconi

Vincentius Caſſela )

Omnes ſeſe peculiariter obligaverunt quotannis recitare Officiũ  
cũ Octava Dedicationis hujusmodi, cujus anniverſarium perpe-  
tuum diem dictus Eminentifs. Archiepiſcopus Conſecrator in actu  
prædictæ Conſecrationis assignavit Dominicam primam poſt Octa-  
vam feſtivitatis Omnium Sanctorum, ad quam transferre, & tran-  
ſuſſiſſe decrevit

Ac poſtremò ob grati animi teſtimonium teneri voluerunt audita  
morte ejuſdem Eminentifs. Domini Conſecratoris (quem Deus diu-  
tiſſimè ſervet incolumem) ſemel ſolemne Deſunctorum officium  
cum tribus nocturnis recitare, & Miſſam de Requie cũ cantu pro  
ejuſ anima celebrare; publicumque documentum hac de re tradere  
Vicario Capitulari.

Qui



Qui omnes, nempe tam dictum Reverendissimum Capitulum; quam præfatis Subcollector, & Oeconomus Archiepiscopales sefe nominibus, quibus supra, & successores in futurum obligaverunt in forma Camere Apostolicæ cum solitis clausulis, &c. & tacto pectore juraverunt, &c.

Super quibus omnibus, & eorum singulis tam mihi Notario Apostolico Prothonotario nuncupato, quam subscriptis Reverendissimis Dominis Connotariis Prothonotariis item nuncupatis demandatum fuit à dicto Eminentiss. Domino Archiepiscopo Consecratore, ut unum, vel plura publicum, seu publica conficere, atque tradere deberemus Instrumentum, & Instrumenta prout opus fuerit, & requisiti erimus.

Actum Beneventi in dicta S. Metropolitana Ecclesia ipso solemnibus ejusdem Consecrationis tempore, adstiteribus dictis Reverendissimis Dignitatibus, & Canonicis unoqueq; Sacris paramentis pro suo ordine induto, scilicet Dignitatibus Pivialibus, Canonicis Presbyteris Casulis, Canonicis Diaconibus Dalmaticis, & Canonicis Subdiaconibus Tunicellis; hac die XXVI. mensis Maii Anno reparatæ salutis MDCXCII. Pontificatus Beneventani ejusdē Eminentiissimi Consecratoris anno VII. Ordinationis verò suæ XVIII. Præsentibus protestibus Adm. Rev. P. Pompejo de Palma Congreg. Oratorii Neap. Illustrissimis Dominis Michaelē de Morra Duce Manculicrum, & Domino Josepho Capasso Comite Pastenarum ad prædicta omnia; & singula vocatis habitis specialiter, atque rogatis; & populo penè innumero, qui ad Encoenicum solemnia pia religione confluerat. Et in fidem, &c.

*Ita est Agnellus Rendina Canonicus, & Bibliothecarius S. Metropolitanae Ecclesiæ Apostolica auctoritate Notarius, Prothonotarius nuncupatus in solidum cum infrascriptis Reverendissimis Dominis Connotariis, Prothonotariis nuncupatis rogatus subscripsi, & signari requisitus.*

Locus \* Signi.

*Ita est Joannes de Nicastro Primicerius primus dictæ S. Metropolitanae Ecclesiæ Apostolica auctoritate Notarius, Prothonotarius nuncupatus, una cum prædicto Reverendiss. Domino Agnello Rendina Canonico Bibliothecario, & Connotario Apostolico, & infrascriptis aliis Reverendissimis Dominis Connotariis pariter Prothonotariis nuncupatis de præmissis rogatus subscripsi, & signari requisitus, &c.*

Locus \* Signi.

*Ita est Aloysius Antonius Ajellus Primicerius secundus dictæ S. Metropolitanæ Ecclesiæ prædictæ Apostolica auctoritate Notarius, Prothonotarius nuncupatus, unà cum prædicto Reverendiss. D. Agnello Rendina Canonico Bibliothecario, & connotario Apostolico, & superscripto, & infrascriptis aliis Reverendissimis Dominis Connotariis, pariter Prothonotariis nuncupatis de præmissis rogatus subscripsi, & signavi requisitus, &c.*

Locus ✱ Signi.

*Ita est Joannes Andreas Moscarelli Thesaurarius dictæ S. Metropolitanæ Ecclesiæ Apostolica auctoritate Notarius, Prothonotarius nuncupatus, unà cum prædicto Reverendiss. D. Agnello Rendina Canonico Bibliothecario, Connotario Apostolico, & superscriptis, & infrascriptis aliis Reverendissimis Dominis Connotariis, pariter Prothonotariis nuncupatis de præmissis rogatus subscripsi, & signavi requisitus.*

Locus ✱ Signi.

*Ita est Joannes Baptista de Martino dictæ S. Metropolitanæ Ecclesiæ Canonicus prædictæ Apostolica auctoritate Notarius, Prothonotarius nuncupatus unà cum prædicto Reverendiss. D. Agnello Rendina Canonico Bibliothecario, & Connotario Apostolico, & superscriptis, infrascriptisq; aliis Reverendissimis Dominis Connotariis, pariter Prothonotariis nuncupatis de præmissis rogatus subscripsi, & signavi requisitus, &c.*

Locus ✱ Signi.

*Ita est Bartholomæus Feolus dictæ S. Metropolitanæ Ecclesiæ Canonicus prædictæ Apostolica auctoritate Notarius, Prothonotarius nuncupatus, unà cum prædicto Reverendiss. D. Agnello Rendina Canonico Bibliothecario, & Connotario Apostolico, & superscriptis, infrascriptoque aliis Reverendissimis Dominis Connotariis, pariter Prothonotariis nuncupatis de præmissis rogatus subscripsi, & signavi requisitus.*

Locus ✱ Signi.

*Ita est Andreas Abbas Vollari Rector S. Argeli Portæ Summæ hujus Civitatis prædictæ Apostolica auctoritate Notarius, Prothonotarius nuncupatus, unà cum prædicto Reverendissimo D. Agnello Rendina Canonico Bibliothecario, & Connotario Apostolico, & superscriptis aliis Reverendissimis Dominis Connotariis, pariter Prothonotariis nuncupatis de præmissis rogatus subscripsi, & signavi requisitus, &c.*

Locus ✱ Signi.

V.

## NOTIFICAZIONE

Dell'Altare Privilegiato cotidiano, e perpetuo di  
S. Filippo Neri nella Metropolitana.

*Citata nel Cap. VIII. De Altari Privilegiato, num. 1. pag. 8.*

**L**A santa mem. di Papa Gregorio XIII. a 14. di Agosto del 1578. havea arricchito la S. Chiesa Metropolitana con privilegiare perpetuamente in essa per suffragio delle Anime de' fedeli defunti l'Altare di S. Antonio da Padova; ma essendosi rifatta, e rinnovata la Chiesa, e demolito per necessità quell'Altare, il Santissimo Padre Nostro Papa Innocenzo XII. ad istanza del nostro Eminentissimo Arcivescovo vi hà rinnovato sì gran tesoro per ogni dì in perpetuo nell'Altare eretto, e dedicato à S. Filippo Neri, concedendo, che quante volte ivi si celebra la Santa Messa per l'anima di qualsivoglia fedele, che sia trapassato nella Carità di Dio, essa anima, ottenga dal tesoro della Chiesa tale Indulgenza, che per gli meriti di Gesù Christo, della Santiss. Vergine, de' Beati Apostoli Pietro, e Paolo, e degli altri Santi, sia liberata dalle pene del Purgatorio. Il tenor del Breve è il seguente:

INNOCENTIUS PAPA XII. *Ad perpetuam rei memoriam.*  
*Dudum fel. rec. Gregorius Papa XIII. Prædecessor noster Metropolitanam Ecclesiam Beneventanam, simili, eoque privilegio minime decoratam, ac in ea Altare S. Antonii de Padua in Cappella Societatis Sanctissimi Sacramenti situm speciali dono illustrare volens, auctoritate sibi à Domino tradita concessit, ut quoties Missa ad prædictum Altare celebraretur pro anima cujuscumq; fidelis, quæ Deo in charitate conjuncta ab hac luce migravisset ipsa de Thesaurò Ecclesiæ Indulgentiam consequeretur, quatenus Domini Nostri Iesu Christi, Beatissimæ Virginis Mariæ, BB. Apostolorum Petri, & Pauli, & aliorumq; Sanctorum omnium meritis suffragantibus à Purgatorii penis liberaretur, & alias, prout in ipsius Gregorii prædecessoris literis sub plumbo desuper anno Incarnationis Dominicæ 1578. Fride Idus Augusti Pontificatus sui Anno VII. expeditis, quarum tenorem præsentibus pro expresso haberi volumus, uberius continetur. Cum autem, sicut dilectus filius noster Vincentius Maria S. R. E. Presb. Card. Ursinus nuncupatus ejusdem Metrop. Ecclesiæ Beneventanæ ex concessione, & dispensatione Apostolica Præsul Nobis nuper exposuit, alias occasione totalis restorationis, vel potius renovationis dictæ Metropolitanæ Ecclesiæ prædictum Altare S. Antonii de Padua demoliri necesse fuerit, ipseq; Vincentius Maria Cardinalis, & Præsul aliud*

*aliud subindè Altare in honorem S. Philippi Nerii conftrui curaverit , deindè verò postremi Terramotus causa, quo Civitas Beneventana afflicta fuit fere tota Metropolitana Ecclesia supradicta diruta fuerit , dictusq; Vincentius Maria Card. & Prasul illam iterum readificari curet , in eaq; novum Altare sub invocatione ejusdem S. Philippi Nerii extrui , & instaurari facere intendat; Et propterea privilegium supradictum per Nos , ut infrà , transferri summopere desideret. Nos ipsius Vincentii Mariae Cardinalis, & Prasulis, decorem, Domus Dei laudabiliter diligentis pietatem plurimum in Domino commendantes, supplicationibus ejus nobis super hoc humiliter porrectis benignè inclinati , Privilegium , & Indulgentiam supradicto Altari S. Antonii de Padua per memoratum Gregorium predecessorem concessam , ut praefertur , ad novum Altare S. Philippi Nerii , sicut pramittitur extruendum , & instaurandum ex nunc , prout ex tunc postquam sic extructum , & instauratum fuerit , Apostolica auctoritate tenore praesentium, servata tamen in reliquis supradictarum Gregorii Praedecess. literarum forma, & dispositione , perpetuò transferimus , & trasportamus. In contrarium facientibus , non obstantibus quibuscumque Dat. Roma apud S. Mariam Majorem sub Annulo Piscatoris die xx. Septembris 1691. Pontificatus nostri Anno Primo.*

*I. F. Card. Albanus*

Si effortano tutti i fedeli della Città, e Diocesi, che si vagliano di tanto tesoro sì per gli loro defunti , sì per le anime loro , quando saran trapassate. Quel famoso Giuda Macabeo , ancorche dedito a squadronare gli Eserciti , si diede anche a raccor danajo , e mandò dodici mila dracme di argento in Gerosolima, perche se ne offerisse sacrificio per l'anima de'morti. Quanto havebbe fatto più, se fosse stato a tempi nostri , se quel Sacrificio era sol'ombra del nostro , e se aperto il tesoro dell'Indulgenze havebbe potuto recar loro tanto suffragio ? Unico era quell'altare in Gerosolima , ed unico in tutta la Città , e Diocesi nostra , è l'Altare privilegiato , cotidiano , e perpetuo del glorioso S. Filippo Neri: per tanto i Signori Arcipreti, Rettori , ed Economi per comandamento dell'Eminentissimo Arcivescovo pubblicino a' loro Parrocchiani sì gran tesoro ; e gl'invitino a valersene , essendo santo , e salutevole il pensiero di procurare la liberazione delle anime sante del Purgatorio, acciocchè esse libere da quelle pene, sianò per noi avvocate presso il Padre delle misericordie. Benevento nel Sinodo a' 24. di Agosto 1692.

*G. Fodero segretario del Sinodo.*

**I L F I N E.**